

13

T 3210/1432.83

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
JAN 10 1941

平湖縣志卷九上

哈佛大學漢和圖書館珍藏印

平湖縣知縣候補同知王恒修

人物 列傳

書記言春秋記事龍門別成列傳遂立捺觚圭臬邑東湖瀦吳峯仰襟帶丑乙間清淑所聚鬱為英多

熙朝陸清獻挺生昌明理學士林翕然宗之地靈人傑理固然與其他摘文礪行代不乏人餘芬猶足津逮焉若夫慈孝貞烈廼敦厚倫紀之本亦烏可畧而弗詳志人物

列傳 按朱志列傳以傳公卿大夫高志張志改為事功仕績則與程志名臣經濟諸目同一贅矣今內自中書外自知縣凡官七品以上者均入列傳台為一編

陳

顧野王陳晝字希馮祖子喬梁東中郎武陵王府參軍事父
烜信威臨賀王記室兼本郡五官掾以儒術知名野王幼好
學七歲讀五經畧知大旨九歲能屬文嘗製日賦領軍朱异
見而奇之年十二隨父之建安撰建安地記二篇長而遍觀
經史精記嘿識天文地理著龜占候蟲篆奇字無所不通梁
大同四年除太學博士遷中領軍臨賀王府記室參軍宣城
王爲揚州刺史野王及琅邪王褒並爲賓客王甚愛其才野
王又善丹青王於東府起齋乃令野王畫古賢命王褒書贊
時人稱爲二絕及侯景之亂野王丁父憂歸本郡乃召募鄉

黨數百人隨義軍援京邑野王體素清羸裁長六尺又居喪
過毀殆不勝衣及杖戈被甲陳君臣之義逆順之理抗辭作
色見者莫不壯之京城陷野王逃會稽尋往東陽與劉歸義
合軍據城拒賊侯景平太尉王僧辯深嘉之使監海鹽縣高
祖作宰爲金威將軍安東臨川王府記室參軍尋轉府諮議
參軍天嘉元年勅補撰史學士尋加招遠將軍光大元年除
鎮東鄱陽王諮議參軍太建二年遷國子博士後主在東宮
野王兼東宮管記本官如故六年除太子率更令尋領大著
作掌國史知梁史事兼東宮通事舍人時宮僚有濟陽江總
吳國陸瓊北地傅緯吳興姚察並以才學顯著論者推重焉

遷黃門侍郎光祿卿知五禮事餘官竝如故十三年卒時年六十三詔贈秘書監至德二年又贈右衛將軍野王少以篤學至性知名在物無過辭失色觀其容貌似不能言及其勵精力行皆人所莫及第三弟充國早卒野王撫養孤幼恩義甚厚其所撰著玉篇三十卷奉

旨編

入四庫全書

輿地志三十卷符瑞圖十卷顧氏譜傳十卷分野樞

要一卷續洞冥紀一卷元象表一卷並行於世又撰通史要畧一百卷國史紀傳二百卷未就而卒有文集二十卷

按朱志首顧榮本府圖記勾踐支庶以顧邑為姓之說然海鹽不以顧邑改未敢定為邑人也至載野王則自宏治

海鹽志始胡震亨証以其子安饒墓謂收入良是今泖上有顧書堵即野王讀書處故以為列傳冠

宋

魯宗道宋史字貫之亳州譙人少孤鞠于外家諸舅皆武人

頗易宗道宗道益自奮勵讀書袖所著文謁戚綸綸器重之

舉進士為濠州定遠尉再調海鹽令縣東南舊有港導海水

至邑下歲久湮塞宗道發鄉丁疏治之人號魯公浦改歙州

軍事判官再遷秘書丞陳堯叟辟通判河陽天禧元年始詔

兩省置諫官六員考所言為殿最首擢宗道與劉弈為右正

言諫章由閣門始得進而不賜對宗道請面論事而上奏通

進司遂爲故事嘗言守宰去民近而無以區別能否今除一守令雖資財低下而考任應格則左司無擯斥故天下親民者黷貨害政十常二三欲裕民而美化不可得矣漢宣帝除刺史守相必親見而考察之今守佐雖未暇親見宜令大臣延之中書詢考以言察其應對設之以事觀其施爲才不肖皆得進退之吏部之擇縣令放此庶得良守宰宣助聖化矣真宗納之宗道風聞多所論列帝意頗厭其數後因對自訟曰陛下用臣豈欲徒事納諫之虛名邪臣竊恥尸祿請得罷去帝撫諭良久他日書殿壁曰魯直蓋思念之也尋除戶部員外郎兼右諭德踰年遷左諭德直龍圖閣仁宗卽位遷戶

部郎中龍圖閣直學士兼侍講判吏部流內銓宗道在選調久患銓格煩密及知吏所以爲奸狀多釐正之悉揭科條臨下人便之雷允恭擅易山陵詔與呂夷簡等按視還拜右諫議大夫參知政事章獻太后臨朝問宗道曰唐武后何如主對曰唐之罪人也幾危社稷后默然時有請立劉氏七廟者太后問輔臣衆不敢對宗道不可曰若立劉氏七廟如嗣君何帝太后將同幸慈孝寺欲以大安輦先帝行宗道曰夫死從子婦人之道也太后遽命輦後乘輿時執政多任子於館閣讀書宗道曰館閣育天下英才豈統袴子弟得以恩澤處邪樞密使曹利用恃權驕橫宗道屢於帝前折之自貴戚用

事者皆憚之目為魚頭一政因其姓且言骨鯁如魚頭也再
遷尚書禮部侍郎祥源觀使在政府七年務抑僥倖不以名
器私人疾劇帝臨問賜白金三千兩既卒皇太后臨奠之贈
兵部尚書宗道為人剛正疾惡少容遇事敢言不為小謹為
諭德時居近酒肆嘗微行就飲肆中偶真宗亟召使者及門
久之宗道方自酒肆來使者先入約曰即上怪公來遲何以
為對宗道曰第以實言之使者曰然則公當得罪曰飲酒人
之常情欺君臣子之大罪也真宗果問使者具以宗道所言
對帝詰之宗道謝曰有故人自鄉里來臣家貧無杯盤故就
酒家飲帝以為忠實可大用嘗以語太后太后臨朝遂大用

之初太常議諡曰剛簡復改為肅簡議者以為肅不若剛為

得其實云 按魯宗道墓誌初諡剛簡更諡肅簡後終諡簡肅宋史未詳

按宗道舊志皆人流寓考宗道曾為海鹽令似應歸名宦

然其墓在今邑治子孫世為邑人因更入列傳

魯書海鹽圖經字季欽號冷齋兄詹崇寧五年進士朝散郎

提舉兩浙市舶嘗同弟譽舉紹興五年進士官大府卿言支

移折變事甚悉利弊詔可其奏 隆興三年嘗奏乞下戶部將折帛以匹計者為錢有幾以

尺計者為錢有幾自來全折錢處依舊外餘丁鹽綿絹及下

戶不成匹兩者盡折錢蓋零細者利于納錢端匹者利于納

絹出產去處便于本色不出產去處便于納錢若以見價紐
折其直必輕則折帛之弊可革請下諸路運司條約州縣劾
其違者嘗於詩喜杜工部嘗取其集考其年編次而箋釋之為

十八卷世所傳魯冷齋杜詩定本是也按四庫全書簡明目

卷詩注又有易說二十卷論語解十卷冷齋集詹子可封進

士烏程令岑子可宗進士又中博學宏辭科太常卿詹子可

簡可簡子开珏及從子藝瓌璠亦並舉進士世其家呂祖謙

輓岑詩慶源滾滾接天流老桂傳香次第秋人物西都九卿選英華

南國十洲遊翛然徑下滕王閣已矣長懷范蠡舟身後楚騷

誰著錄靈光舊草合兼收周必大詩競爽雲間陸應同天上

張樂堂聯折桂南省繼含香風月三千首金釵十二行初終

全五福似續付諸郎自摻江南袂思公歲月徂書來襄棣鄂

人去重葭苧東粵仍閩粵當湖遂鏡湖堂成隨一相浮世竟

須何

按列傳以傳仕宦其子孫弟姪已登仕版雖卑秩亦為附

傳若諸生則改入行詣另為傳其祖父以子孫重者則云

子孫某人有傳子孫以祖父重者則云某人子某人孫若

互相引重者並書之至舊志所載子孫某人中某科某甲

官某階而無傳者亦不遽削示有所考

又按前人著作舊志所不詳散見載籍者其書雖不盡傳

仍錄其書名人傳亦不復著所自出以省繁瑣又字號可

考者亦並補入

魯文謚嘉興府柳志叅海鹽圖經字子順宣義郎壽淵曾孫

按府柳志作壽寧孫舊邑志皆因之今從魯氏世譜更正入太學為流輩所敬畏甲戌策第調丹徒尉秩滿薦陞司理高郵滯獄多所梳剔攝丞幕府
適山陽流移蟻聚贊其長極意撫安之性闓爽嗜書史任事

必究端緒不爲矯伉不事投合尤好義樂施置義莊義塾惠其宗人弟文博姪鐸成進士並其教也卒于官

按海鹽圖經魯氏世居當湖登甲榜者前後十八人又有名誼者似與开珏行列不知誰出紹興中官鹽官令有救荒療疫全活功記此俟考括異志又載其家有名行恕官司法者卅角而孤嘗侍母徐就醫嘉興留精嚴僧舍值徐明反母子伏于寺之複衙默禱于神竟得免禍後其孫秀穎亦登進士第

趙孟堅輟耕錄叅海鹽圖經字子固號葵齋系出安定郡王初以父朝奉郎與采蔭入仕後登寶慶二年進士歷官集英殿修撰知嚴州州人張均平報父讎坐死獄不決孟堅立辨之郡內訟息歲饑發廩賑贍全活民五萬餘戶景定初遷翰林學士承旨拜榮祿大夫孟堅修雅博識善筆札工詩文性不羈好飲酒醉則以酒濡髮歌古樂府自執紅牙以節曲宋亡入元不仕隱居廣陳時載一舟中置琴書尊杓泊蓼汀葦岸以看夕陽賦曉月爲事嘗到縣縣令宣城梅徽造船謁之竟飛棹去梅佇立岸上言曰昔人所謂名可聞身不可見殆謂先生歟酷嗜法書遇三代已來金石名蹟傾家易之不靳嘗得白石藏穉序五字不損書喜甚夜歸雪溪舟覆行李盡沒孟堅手持帖立淺水中大叫曰蘭亭在此餘不足介意也

因題八字卷首云性命可輕至寶是保又善作梅竹往往得
逃禪石室之妙于水仙尤奇時人珍重比之米南宮孟堅亦

自以為不歉也著有葵齋文編四卷

入四庫全書

年九十七卒諡

文簡

姚桐壽樂郊私語公從弟子昂自茗中來訪公閉門不納夫人勸之始令從後門入坐定第問弁山笠澤近來

佳否子昂云佳公曰弟奈山澤佳何子昂漸退公便令蒼頭濯其坐具蓋惡其作賓朝家也余少從婦翁得見子昂自是

第一流人物何敢輕議今身當葵齋公里第有想像其鼓棹行吟處致企慕耳

按珊瑚木難錄子固梅竹卷稱畫于景定庚申跋中自稱

老越八年為咸淳丁卯葉隆禮繼跋稱子固已死又明年

跋者為孟淳孟滌皆子固之弟稱為先兄似子固歿于宋

亡之先考據鑿鑿然姚桐壽嘗卜居廣陳與子固先後同

里其言必非無憑厲樊榭宋詩紀事亦云子固宋亡不仕

朱存理骨董家言恒多贗造恐不足據耳

陸文遠程志字伯及第進士官至都巡檢諡貞恪正直不撓

侃侃入對以修德建儲進賢遠奸語廷臣失色度宗改容納

之立朝四十餘載家無擔石儲自題曰三朝白髮兩袖清風

乞休後每游名山大川聚徒講學以主靜為本祖籍吳郡十

二世祖希聲相唐昭宗相業甚著再傳至德遷五代兵燹入

金谿之青田又再傳至文安象山兄弟以道德師表來學十

世同爨勅旌義居文遠係文安四世孫意不忘本遂卜居吳

之長水齊景鄉晚年率子聞韶聞車孫昌二構室天柱山著

老子解離騷解皇極大衍數大樂書等三十六卷

按程志陸文遠朱志改作陸啟楨又云字兆聖考徐文貞

象山祠碑啟楨文安元孫官嘉興路巡檢核之本傳疑卽

一人故不復分傳

元

馬必遠

程志作必達

朱志字仲彰先世鳳陽人隨宋南渡徙居海

鹽武鄉之圖澤

按本文作居海寧黃灣考程志氏族門黃灣馬氏係御史曠之祖故更正

爲人慷

慨好義至正七年授廣州府判有政聲孫昌年十八值元末

倡義兵禦苗寇一境獲全明洪武十二年詔徵不仕年九十

七卒

賀傑海鹽圖經叅程志先世爲元勲臣祖惟一中書右丞父

億字十萬封恭靖侯傑襲爵至正末爲嘉興萬戶值革命解

所佩金牌投幽瀾井中遜居當湖號湖隱半村道人裔孫燦

然有傳

明

葉春明史叅海鹽圖經字景暘本姓林幼喪父母鞠于葉遂

從其姓性警敏勤學有才識洪武中自邑史歷事吏部者六

年永樂初尚書李志剛知其通練薦于朝授主客司主事以

勤敏周密爲上官所重歷郎中十二年擢兩淮鹽使改叅政

福建仁宗嗣位入朝與廣西布政使周幹廣東按察使熊概

同被命巡視應天鎮常蘇松杭嘉湖八郡訪民利害建革之
 歲餘歸宣德初朝廷以入郡奸吏土豪肆貪虐毒細民久猶
 未戢復命春偕概巡歷訪察後又以指揮任啟御史賴瑛佐
 之所至秉公推明行之以果無所屈撓氛翳擴清單弱咸有
 生氣先後凡三蒞浙西治事于鄉人無議其私者還朝上嘉
 之擢刑部右侍郎歲終得疾上命太醫視療乞歸卒年六十
 有四賜祭命有司治葬

張振朱志叅檇李詩繫字孟起號植蘭少為掾史永樂初工
 部尚書吳中以賢良方正薦授工部主事歷陞刑部郎中出
 為四川夔州知府性至孝親歿顏所居曰終慕堂少師楊榮

宮保金幼孜贈以文稱其有忠孝大節

戈定遠海鹽圖經字尚武工古文辭永樂丙戌貢人成均選

河南道御史彈劾封駁無少避忌陞交趾按察司副使蒞官

清勤平獄訟綏柔有方致仕卒于家寧獻王朱權送定遠歸

泗水津頭望白雲幾處別情春晚路隔年小夢夜歸人嘉禾

海上青山冷萱草堂前白髮新此日天心應可鑒由來孝子

按以上皆析邑前人里居在邑境舊志纂入今從之

沈琮嘉興府柳志叅朱志字公禮號石臆正統壬戌進士程志

平湖科甲授南兵部武庫主事遷四川夔州守改重慶皆以

喪不赴琮父母相繼沒與弟肆廬墓者六年朝夕哭泣日食

淡粥有白鶴野雉之祥天順五年事聞詔旌其門曰孝行之
門七年琮上疏言臣先任主事與弟御史肆同廬肆以陰濕
成疾而沒是爲死孝過臣遠甚臣被褒旌而肆不及乞移旌
臣之典於臣弟臣不勝感幸部議寢不行時琮任廣東廣州
知府善政爲諸郡最以病歸卒琮少穎異卓有志操居家奉
先事親長咸恪謹動稽禮法御諸子弟皆秩秩馴雅可觀鄉
人慕之俗由以變著有石牕漫藁東宇藁廣遊集紀行藁宦
遊筆錄

按列傳以科甲爲先後同榜則依名次附傳者不一例論
沈肆嘉興府柳志叅程志字公貴號青璧正統甲子鄉試第

一景泰辛未進士任山東道御史幼警悟八歲能文與兄琮
齊名而尤敏捷居官廉介有風裁服父母喪廬墓五年雞骨
不支諸兄強舁歸卒于家時年三十八著有程朱書類讀史
脩遺橋門漫藁柏臺新藁四書口義

馬瞻程志叅分省人物考字季明少穎敏薛文清見而奇之
曰神韻雋遠必爲一代偉人年十八領鄉薦天順甲申成進
士任行人賑河南諭祭于少保封衡陽王封琉球中山王所
至餽遺無所受琉球王敬禮之爲立却金亭擢南雲南道御

史按程朱二志皆作河南道疏奏蚤建儲謹災異飭武備防水旱憲宗嘉
納之書其名於御屏巡視京畿行部所至權貴震懼因其姓

稱曰誠驄馬御史也以直聲聞於朝家居崇孝友勵清白歷
官內臺居第如故輿馬或假於人及卒世咸惜之采志時稱
真御史者

必曰平湖二馬蓋
指馬昆與瞻云

沈榮分省人物考字元節號吾匏天順甲申進士授工部主

事與侍郎同監龍江商稅力祛時弊有廉能聲知廣東潮州

府嚴通番之禁公私鹽之稅未幾居喪服除調福建延平府

所至不畏強禦歷江西臨江府皆有清譽莊定山謂十年清

沈美南京今日臨江沈更清蓋確論也西江志榮政尚嚴明
吏民畏服學問博洽

尤善吟咏尋陞貴州叅政糧運軍餉裁制有法乃上疏乞養榮既

貴起居服食一如寒素孝友天成詩文冲澹純雅有熙貞集

嘉興府吳志孫亞垣亞嘉靖丙戌進士歷知南直山陽鹽城

縣以勞著垣有傳鄭延酬元節舟中有懷吾匏詩咫尺青雲
是畫圖肯將書劒老江湖經旬不見匏居

子筆視荒
來一字無

許盛程志叅分省人物考字昌世天順甲申進士授刑部主

事署員外郎審錄陝右繫囚平反死刑百餘人雪徒流以下

尤衆擢四川按察僉事先是蜀府莊戶侵民山田致有格鬪

死傷者獄久不決盛徧歷界壤廉得其情置之法且立約善

後民甚便之丁艱服闋補分巡川北道大竹饑貧民投券富

室而取其粟有司坐以盜劫盛令具本息償之悉薄其罪儀

隴鉅寇嘯聚勢燄張甚盛誅其首惡餘黨悉平及更川西上

流羅泉諸井鹵丁憤所司微不如令各塞其井幾至狂逞盛酌宜處之帖然復業改山東未幾轉雲南副使民有鬻銅爲生者讐家誣以盜礦獄具瘦死已半盛辯釋之致政歸囊橐蕭然卽世未幾子孫有不能自存者人皆稱爲清白吏

倪輔嘉興府劉志叅萬姓統譜字良弼生而穎異讀書過目成誦天順甲申進士授吏部主事三載遷郎中廉奸革弊權貴休以威弗怯誘以利弗動士論難之嘗奉命冊封秦楚二藩餽遺槩却不受歸惟圖書數冊而已居常卜地葬親術曰不利於鄰遂弗用起復陞湖廣叅政以廉律已治峒猺恩信所及無不感慕卒於官士民如失怙恃輔性警悟喜談論處

事不苟工詩爲文務去陳言著有類劇藏稿獻笑存稿朱志輔爲

叅政時焦萬當國輔題畫竹紙扇以貽京貴曰不須高萬丈清氣滿乾坤任爾西風惡何曾曲向人

俞迪分省人物考字允吉以天順年鄉貢任廣東都司斷事

朴茂好古清操凜然諸方岳皆敬憚之有指揮王江失機監司欲并坐于指揮屬迪案之迪曰國法失機死者不得襲于非其罪可以無白乎力爭之監司卒如迪議貸之於是潛以千金爲謝堅拒不受三年掛冠歸于泣拜曰祖父汗馬之勞子孫幾失之得公以延德豈敢忘公大義凜然他無敢請矣願以弱息奉箕箒迪曰余老矣萬萬不可次孫尚未婚以爲媳于益感德結婚而歸行李蕭然空泛終世鄉閭士大夫誦

不置口

陸綸程志以恩貢授四川夾江知縣單車就道入境輒拒郊迎品物器用出自里甲舖戶俱給還之羨餘一無所取政簡刑清案無留牘月立二會厚賞格以厲士文風大振秩滿以艱歸遂致仕家徒四壁築室墓傍居之

按府柳志貢選綸任大典主簿或筮仕主

簿繼遷知縣耳

陸銀兩浙名賢錄叅廣東通志字克潛成化間出貢生授廣東程鄉知縣程鄉在山海間多劇盜銀初至議者皆以殄盜爲急銀謂與民未有恩信何遽勞民乃新學舍以禮義勵諸生問民疾苦晝夜不息期年之後始團練義勇間出勦寇斬

捕常至于百盜賊畏威慕化相約無犯銀政務廉平獄訟至皆立辨吏民畏之程俗構訟多以賂勝銀門內肅然訟減十七常戲語人曰大畏民志謂是耶以母喪歸民號泣攀轅者數千人出境而後返行至常山卒朱志銀性至孝父珪患癰銀咋之而愈母李畏雷雷輒趨侍至達旦不寐後竟以哀毀死常山道中囊無一錢逆旅主人徐文育爲之棺殮銀去官程人猶以陸公來憚賊聞變設位巷哭立祠祀之後以孫杰累贈副都御史子淞孫杰有傳兄子溥字文博邑生以貲授上海縣丞調豐城督運夜過采石舟漏溥跪禱曰舟中一錢非法願葬江魚腹禱畢漏止天明視之有三魚裹水草塞漏

等以亢直罷官歸

吳佐程志字懶雲少穎異舉止不凡工書法善吟咏中成化乙酉舉人授湖廣岳州通判循良有聲宦味殊澹雅誦歸去來辭慰留踵接不顧也

過璘分省人物考叅朱志字太璞號一齋出贅華亭顧氏因居華亭又號半松少失怙恃年十九猶混迹廛市間一旦棄去力學由邑諸生領鄉薦登成化丙戌進士授工部主事分司呂梁洪再管濟寧闡為三原王端毅恕所推重改刑部歷員外郎中許州民趙道隆為儉人誣以妖言利其死以覲賞連及數十家察其枉出之奉詔賑饑山東還陞江西副使豐

城李民泰陷平民兄弟三人為劫盜繫獄十年得其情杖殺民泰而盡釋繫者人服其神尋致仕歸璘閭朗剛直志存當世而才足濟之家居二十餘年兩目俱病然廣筵長坐議論出入經史竟日忘倦年七十九無疾而卒

方輅嘉興府柳志字宏載成化丙戌進士任監察御史調陝西肅州衛經歷

按柳志後諸志不立輅傳惟樵李詩繫錄輅貞婦一詩沈季友持擇甚嚴知必有可傳者事實雖無徵仍從柳志

屠勲分省人物考字元勲號東湖成化己丑進士授工部主事分司清江浦督造運舟公廉有能聲改刑部歷員外郎中

剖決無滯每獄有疑及事干權貴者尚書林聰皆屬之罔不
 協眼京城無藉子李勝誘其主之子福為私鑄而陰令詞事
 者發其事福坐戍邊眾知其冤莫敢問勲曰此奴利主之產
 也為直其事以福罪罪勝而歸其產又林都事素挾依附搆
 訟蟠引不可解覈得實卒論如法直聲益起遷大理寺少卿
 上言暑月疏決囚徒兩京一體五年一遣官錄州郡獄著為
 令應制陳言疏茲者天道亢旱特降勅諭文武羣臣共加修
 省且令條奏軍民利病時政得失以聞臣伏讀聖諭有以
 知皇上敬天恤民之心修德勤政之實直欲循而行之非
 徒姑應故事而已臣備員法曹謹以刑政一二有當舉革者
 膚見條陳伏惟聖明採擇一乞恩例以清刑獄照得在京法
 司見監問囚犯每遇天道暄熱皇上憫念罹獄之苦特降綸
 音笞罪無干証者釋放徒流以下減等發落該枷號者具奏
 都免枷號死罪情可矜疑者多至宥死充軍恩至渥也然而

南京繫祖宗根本之地彼處法司監問囚犯常滿千數臣嘗
 謬司審錄頗知一二每遇暄熱或不蒙此恩例再照天下司
 府州縣尉所監問囚犯先年奏准五年一次差官審錄以為
 常例宏治四年例該差官止于南北直隸奏差刑部郎中二
 員其餘浙江等處十三布政司行合巡撫巡按等官審錄緣
 各官巡治地方事務繁冗偏州僻縣豈能一一徧歷有司憚
 於申請往往預先捶楚至死以為已便者不能無之以故矜
 疑重犯奏請處置者十常二三耳陰陽失和亦未必不由此
 伏望聖明一視同仁凡遇暄熱兩京法司見監囚犯俱乞恩
 例一體溥施仍乞勅刑部查照先年差官審錄事例照舊選
 差明慎官員分投審錄惟復將災傷去處不必差官行移巡
 撫巡按等官審錄其各官務要上體聖心下全民命期無冤
 滯流徒以下就便減等發落死罪情可矜疑并應合辯理者
 一一具由星馳奏聞區處如此庶幾刑獄清而天意可回矣
 會漳寇濫文進煽亂上勅勲撫輯至則諭以禍福誅首惡黨

與悉不治擢右副都御史整飭薊州諸郡邊備巡撫順天永
 平以近畿役重民貧京邑尤甚疏請裁省夫役昌平密邇山

陵供應浩繁疏停牧馬以示優恤其經略邊備奏分薊州密雲建昌三路屯兵緩急相援於潮河川築城堡虎落設險居守及增置黃花鎮營堡戍兵聲勢聯落自是無輕犯者又奏徙熊兒峪馬營于便地就水泉人免病渴猪圈頭關多水患歲苦修築亦奏徙之南北水峪歲省役卒數百人寶坻白龍港產銀魚中使歲取供薦因之橫索民不能堪麻峪山有銀礪守臣以中旨索之皆疏言其不可詔戒約中使而礪事卒不行轉刑部侍郎會戚畹壽寧侯與河間民爭田構訟奉旨覈勘上言食祿之家不言利况母后誕毓之鄉而與小民爭寸地臣以爲不可孝宗嘉納卒歸其田于民尋擢右都御史

協理院事武宗嗣位首上郊祀籍田幸學三事且以正心講學爲本謂初服新政宜求實意勿徒循故事爲美觀又請日以真西山大學衍義進講拜刑部尚書時逆瑾用事諸司諷先關白而後奏聞勲執不從曰若是不惟三尺法可以喜怒高下亦且無朝廷矣瑾銜之乃引疾求去加太子太保致仕賜勅給驛歸未幾瑾敗又八年卒贈太保諡康僖勲性穎敏甫成童已學貫經史有重名嘗曰士當無書不讀雖屢更劇曹恒手不釋卷尤善詩歌著有東湖遺稿十二卷載明史其藝文志其行義鄉評尤重若辨家廟昭穆置義田義塾皆可爲世法子應埴應坤應埆俱登進士應埴湖廣提刑副使應坤雲南叅

政應竣有傳朱葵尊明詩綜楊應寧云屠公屢更劇曹手不釋卷與余爲文字交居嘗過從必有倡和辭章之名播于中外

沈珪張志字廷瑞成化辛卯舉人授福建延平府推官多所平反上官至督供張珪以地瘠民貧辭改任南直安慶時池州民胡譚二姓爭湖地胡賄案者珪推鞠得情竟直譚告歸卒孫一卿有傳

屠熙程志字元明成化甲午舉人授湖廣武昌府推官有盜久弗決俱年未三十斷曰此獄成越十八年矣去盜時年纔十二三殊可矜疑竟辨其誣陞江西建昌府同知掌府篆益府中人強籍民貲戶派借銀私蓄若干責其重息民甚病之

諭以利害遂戢改南直太平府廨宇蕭然如僧舍歷官三郡僅以一僕隨行居家友弟課子以清白稱沒後累贈江西叅議子奎堯各有傳

陸愈分省人物考字抑之號貞菴成化乙未進士授南直江都知縣爲治一本仁愛窮鄉下里靡不歷月召有年德者鄉一人詢民疾苦江田消長不常稅額不損馬多領牧于無丁產者城南供餽歲所糜不貲一一爲之均賦而節約之民困頓甦水居甯不知蓄泄數苦旱澇邵伯鎮河塘數厄於衝嚙始教之開渠以待盈縮復爲伐石以甃其塘積患乃除歲凶民多鬻子女於江南亟捐俸入并公餘錢贖以還者幾百人

每新穀未登輒發其舊廩散之約秋成償貧者甚得濟巡撫李都憲籍所部羨銀十數萬兩將上之特請留之江淮活無窮民命江南屯卒爲暴境內一旦單騎徑往擒其魁奏置巡檢司控制之勢乃戢憲臣籍平民數百家爲兵與抗執累月竟得免既三載召拜御史監通積局竹木及巡視京倉人人稱平中貴人欲有所私不可得歷山西道御史尋巡按四川鋤豪強斥貪墨發奸弊風稜甚峻上自崇藩下至羗酋咸凜凜莫敢縱尤加意學校孤寡及死獄大修成都郡學勸養濟院於營昌出成案之不能生者亡慮百十數滿一載將代以盛暑行炎鄉得疾旋成成都遂不起年五十

徽新安吳和

馬昆程志字克昌幼岐嶷成化乙未進士授江西永新知縣

邑介梅花洞洞獠黑脚龍等入境肆掠昆戎服督兵擒元惡平之鄰邑劉伍二大姓訟二十年不決以屬昆片言折服捐商賈引錢易粟以賑饑擢河南道御史彈劾不避權貴中人劉瑾憚之勅理兩淮鹽法淮大賈哀數萬金以餽計通鹽利畏昆而止適鹽有餘銀疏請備賑時黃河溢爲淮患又請以餘鹽易價督郡邑築石堤禦之淮人立祠尸祝焉會雲南盜起瑾銜之陞備兵叅政昆蒞任以德化諭盜悉解散卒于官馮俊程志叅分省人物考字世英成化癸卯順天舉人選山西垣曲教諭邑僻人罕知學俊旬授字解捐俸資給諸生激

勵文皓趙載輩始以功名顯移教南直休寧視邑篆堂吏進引價數百斤去之再補山東館陶擢知河南獲嘉縣中人張永征安化所過驕然後迎謁稱民力不任供億永歛容謝調遂平平故無城流賊作亂與許忠節相約死封疆率民兵力禦賊平叙用乞歸絕跡公庭人罕見其面所至祠名宦贈山東叅政子汝弼孫敏功有傳

陸淞程志字文東號東濱四歲能誦毛詩宏治己酉鄉試第一庚戌成進士以祖母老乞歸王端毅恕薦起預修大明會典成擬除翰林力辭授禮部主事歷郎中正德時藩國多踰例請乞淞格不行時劉瑾用事倭使宋素卿賂瑾求數入貢

淞上疏言非中國利且素卿本寧波人潛通外島以邀中國漸不可長請誅之瑾怒中淞他事矯制收下獄瑾敗遷光祿少卿累陞南光祿卿嘉靖初上疏辯忠佞廣言路節財用言極剴切尋乞致仕卒賜祭葬淞性仁厚與人溫煦及臨大事毅然不可奪居官四十年被服飲食如寒士清而不矯人以爲難著有東濱集累贈刑部尚書子杰杲各有傳

朱志淞每宴客酒七

行卽徹人以爲古道云

曹瓊程志字玉夫宏治癸丑進士選翰林院庶吉士授御史侃侃持風裁有威畹投千金乞置讐家于辟正色曰人命至重吾不受此辜金也爲御史數年論列百許多中機宜劉大

夏論人才嘗曰諫垣中如曹瓊他日當大用無何卒于官卒後十年鄰人周某以舊嫌訟瓊父于鹺使伍文定愕然曰曹玉夫生平不染秋毫清名至今藉藉其父豈有遺議乎立白之居家孝友俸餘分賑宗戚諸子布衣蔬食子乾元乾六歲孝宗時舉神童面試宮中御批賞賚元嘉靖壬午舉人

施震程志字亨甫宏治癸丑進士授河南固始知縣剔宿蠹清積逋恤熒獨政聲赫然行取補太僕寺丞出爲貴州石阡知府石阡多獠獠出沒剽掠殺人橫野震至繕甲厲兵招攜布信諸蠻遂服郡中多誅茹爲屋嚴令備水備火忠平生蠶直不饋遺朝貴守石阡七年不調觸劉瑾怒罰米三百石浩然掛冠後晉大參秩里居二十年足跡不至公庭身未歿而室如懸磬

沈煉程志字剛夫號一山宏治己未進士歷任江西叅議所至豪右屏息墨吏皆望風引去桃園寇勢猖獗煉挺身戡定卒以凱旋居官耿介絕俗不爲當道所諧然能自行其志蓋進退始終一于剛者子圻有傳

屠奎萬姓統譜字文奎宏治己未進士授御史巡視江西翦戢宸濠黨與復累疏其不軌有直聲官終江西叅議

屠奎嘉興府劉志字文治宏治乙丑進士授南直常州府推官決獄明敏謝絕饋遺擢御史當武宗南巡上疏請回鑾以

光聖德嗣後累疏止興作正朝綱全成晚崇聖學重經筵寬重罰皆持國家大體巡按廣西時徭寇方熾歲饑特甚設法糴運且增價招商禁刷禾船多所全活招降百粵捷聞武宗特勅獎勵云經畧有方多効勤勞賜之金幣陞俸一級特稱爲真御史補山東副使糧運刻期竣事世宗特賜羊酒以勞之致政歸囊橐蕭然雅意詩書足不履郡城者三十六年

潘鵬朱志參構李詩繫字惟遠家貧苦學持論侃侃不肯低回附人亦不輕受人修脯以正德丁卯舉人授廣東肇慶府通判時羣盜蜂起悉力禦之境賴以安不滿考遂掛冠歸歸而窮困如故里人爲之語曰書中車馬多如簇潘明府無一

舟一僕家居二十年足不履公庭門下執經者甚衆年八十

餘卒學者稱東淵先生

按沈懋孝嘗爲鵬與李萼作兩介士傳朱志因合傳今萼另傳文苑

孫璽法志字朝信號峰溪正德戊辰進士

程志爲諸生時五色批評通鑑綱目

忽有蟾蜍蹲其上珍蓄久之孫氏科第始此

除福建興化知縣邑豪徐恩以白衣

入粟補所千戶與其宗人交賂權貴猾賊邑中舊令不能制

璽至廉得其謀殺道姑攫財事及其宗人諸不法狀因擊殺

恩而宗人坐死者數人邑中爲清同時江都豪余某亦坐殺

人獄久不決上官以屬璽偵得其埋尸尸下鞫之囚駭伏居

數年邑以治稱去之日邑人攀擁不得行而徐豪家獨銜璽

不已伺璽去卽持金數千走京師賂閹官銳斬反其獄且中

璽奏下巡鹽張御史御史索璽過不得令璽與豪家同囚繫
 困辱之代者至其事乃白已而陞南直揚州同知會宸濠反
 攻安慶璽守儀真悉捕其黨詔旌之歷任山東雲南山西僉
 事嘗奉命丈皇莊草場地土清其地之為奄戚所漁奪者悉
 歸之民薊州銀冶盜據險為患璽榜示禍福各自縛詣璽罪
 其首餘遣復業及分巡洱海道會麗江土官爭金沙江讐殺
 璽勘其事卒解讐奉約束如故大同兵變後卒伍驕悍為常
 盡心撫馭人賴安堵吉囊入寇贊畫撫臣斬首數多捷聞賜
 金後以衣豸衣謁巡按巡按怒以為慢已被察歸性喜為詩
 著有雲山履歷稿採集遺書總錄著以子植贈刑部尚書植
 有峯溪集五卷

有傳

按孫氏家乘中固璽二傳俱載法志原文今於璽傳參用
 唐順之撰墓志仍著所自以示先河之意

陸琳程志叅分省人物考字文珮號玉洲正德庚午舉人授
 南直清河知縣歲祲撫濟全活數萬俗不諳紡織集老媪教
 之遂為永利安東人兄弟訟久不決琳以義動之感泣相讓
 旋以治行高等擢廣東道御史貴戚歛手清軍湖廣以勾查
 逃解四字立法而隱冒肅清有善歌者嬖于楚藩家頗橫琳
 摘發破柱得之補江西道上封事六條稱旨後巡按四川經
 畧西南躬自督戰所至克捷乃單騎出見開示威信諸酋感

泣乞降會都指揮劉永昌內倚武定侯郭勛權勢與蜀府許
 奏竟按實抵昌罪繼補河南道與大計復論罷中貴姻黨墨
 吏隨劾權黨邊將張麟怙勢不法事不報遂出知江西撫州
 府尋乞骸骨歸享年八十居鄉孝友謙恭俸入悉與諸弟共
 之人稱古君子云著有蘭臺疏稿忠弼堂稿巡川條例賑荒
 事宜

按陸氏家乘琳子三長山次實次宓朱志誤列山傳于琳
 前高志以下因之今更正

姚參榜姓張分省人物考字應辰正德庚午舉人授江西上饒
 教諭以經義訓士器重之擢宜春知縣賑饑興利搏擊權橫

省茶貢費十之九民若更生宸濠之變為王文成守仁應援
 斥諸顧望者濠卒就擒再遷桐廬知縣尋授工部郎中權稅
 荆南益持冰蘂會長子篚舉鄉即挂冠歸居鄉約已敦俗週
 郵故舊子篚簞笈孫體信篚有傳簞笈並舉應天鄉薦體信
 嘉靖丙辰進士官叅政

沈圻程志字子京號龍湫江西叅議煉仲子正德辛未進士
 除御史以直忤當道謫南直高郵州判陞休寧知縣矢心冰
 蘂歷任固原兵備陞貴州叅政因與御史范安互劾為其黨
 所中免歸父子俱官藩臬產不及中人清名勁節藉藉人口
 遺命無入鄉賢

趙漢明史字鴻遠號漸齋正德辛未進士授江西建昌推官擢南戶科給事中改兵科嘉靖初尚書林俊以執奏獄囚李鳳陽被旨詰責漢因言太監崔文亂政巧逞奸欺不特庇一李鳳陽而已工部尚書趙璜發文家人罪文輒捕其謀者痛杖幾死曰此杖寄與趙尚書其無狀至此望急譴逐毋為新政累不聽已哭爭大禮請正大禮疏臣先於正德辛巳五月伏見皇上升自興藩嗣登大寶維時詔諭中外首云皇考孝宗敬皇帝聖母昭聖皇太后其紹承正統炳如日星已而詔尊興獻王為興獻帝與獻王妃為興獻太后此陛下篤厚本生至性也然與漢建平之稱定陶共王師丹以為恩義倍至宋治平之稱濮安懿王司馬光以為不取譏後世程頤以為天地大義生人大倫者殊致當時禮官執論再三不蒙俞允而進士張璁霍韜知縣桂萼行人方獻夫都御史席書等窺見皇上意旨輒思僥倖投合兼以璁考選庶吉士見抑於廷和懷怨泄憤故為異議作嗣統不同

辨以上萼韜各作大禮議書獻夫各陳大禮疏萼又併錄而上之異論從此紛呶宮府一時喧煽今年三月皇上御平臺

召內閣毛紀等草勅加稱尊號勅曰聖母皇太后加稱昭聖康惠慈壽皇太后與獻帝加稱本生皇考恭穆獻皇帝與獻

后加稱本生聖母章聖皇太后且命奉先殿側別立一室以盡追慕而以議不合去汪俊以席書為禮部尚書行取璁萼

等來京此與正德辛巳之詔已不同矣臣方皇皇在職思自勉以獻齋庶或積孚盈缶自臚納約而從議於師丹司馬光

程頤之後不意璁萼到京阿旨得躡陞翰林學士於是自恃清班益鼓異說搖動宮庭拾冷裊段猶之緒餘蔑程朱相傳

之正論條欵賣奏觀其意不使孝武二宗乏嗣統於前朝昭聖太后不自安於宮寢其恇心未已也致蒙皇上近諭毛紀

等去本生字又與三月詔旨不侔夫孝廟稱考獻皇復去本生天下豈有二皇考耶其勢必以孝宗為皇伯考昭聖為皇

伯母矣臣請即璁萼說逐一置辨之璁萼有謂商書兄終弟及故不稱嗣子而稱及王禮獨不云為人後不得顧私親乎

夫為人後者後大宗也謂及王非為人後比於禮何據其謬一有謂祖訓凡朝廷無皇子必兄終弟及是不立後之証也

獨不曰兄終弟及須立嫡母所生乎立者即立後云也而謂祖訓無立後之文可乎設武宗上賓時而朋言鼓倡置陛下

於何地其謬二有謂孔子射於矍相之圃爲人後者斥之不
入夫立後紹統大義攸關矍相射斥此爲有所利而求爲後
者也若混義於利消是於非則二祖列聖之靈昭昭在天將
謂武宗付託何人乎陛下遠遵高祖宏訓近奉武宗遺詔入
紹統緒乃與矍相見斥同辭耶其謬三有謂武宗遺詔初無
繼統之說伏聞遺詔曰遣官迎取來京嗣皇帝位夫嗣者爲
後之謂也爲嗣矣而侈言無繼統之說誰則信之其謬四有
謂親王稱天子爲伯叔父則死亦可稱曰伯叔考者非也晉
鍾雅言景帝不以伯祖登廟宋張齊賢言期之喪天子絕宗
廟安有伯叔氏之稱哉其謬五有謂漢孝宣光武俱爲父立
皇考廟而今宜以爲法非也宣帝於悼考光武於南頓君何
嘗立廟京師哉其謬六有謂迎獻帝主安祀別廟取古者遷
國載主之誼非也此謂國既遷而載主以行爾皇上入繼正
統乃與遷國等乎其謬七有謂祖訓皇后不預外事立君繼
統實遵皇祖明訓不宜假昭聖懿旨者非也夫草昧立國
勢危疑不有昭聖人心何依非常援立母后至此大亂之端也其
外政則辛巳奉迎之命豈得出自臣下耶此大亂之端也其
謬八有謂新頒稱號詔令決宜改易改之不過一言之更不
改將貽百年之辱尤非也夫詔旨渙發字內雷聞王言如綸
綽而條更條改以爲飾觀豈所以重大體乎且初詔何恥辱

也其謬九有謂三公論道九卿分治以譏執禮大臣而又謂
臺諫連名勢有所迫意蓋指臣漢署科事執筆會同科道官
一奏昭聖壽誕不宜免賀似乖慙慙之禮一奏陛下考孝宗
母昭聖今已三年一旦更之則明詔爲虛文不取信於天下
後世祭告爲瀆禮不能格於天地鬼神俱蒙旨切責臣漢又
單名具奏璫曲學偏見違悖正統隆之清秩恐累聖政又奏
宗伯非書所宜任俱蒙旨罰俸臣漢抗章糾劾率衆具疏故
璫等持此說以激聖怒而重其辜其謬十武宗彌留之命以
天下授皇上則大統具明於本始昭聖援立之命以迎立委
多官則至恩無忝於所生况獻帝嘗臣於武宗將以昔在臣
列而位獻帝於武宗下耶抑以今爲皇考而位獻帝於武宗
上耶一去本生二字無所不至此理之大謬而臣久列諫
垣分搽白簡瑕疵小失尚所必糾鼎鑊在前有所不避伏乞
皇上獨崇國統之攸傳如水木本源不容紊越深鑒忠邪之
分辨如黑白蒼素不可混淆儻奮然回旨據師丹司馬光定
說倣定陶濮王故事屹守萬世之經允從人心之公臣之願
也卽本生念切天意難回亦宜確守初詔勿去本生字令孝
宗在天之靈有嗣有續昭聖在宮之養以休以恬依父子之
原稱仍帝后之初號而勿輕有所變更則祖宗列聖之懿澤
靈長而聖子神孫之孝思維則無疆之休端在於此宗祏幸

甚臣愚 幸甚 繫詔獄廷杖歷吏科左給事中以疾去起故官遷工
 科都給事中疏言內閣桂萼翟鑾稱病三月未嘗以曠職懇
 辭張璉久專政權亦未聞引賢共濟乞諭萼鑾亟去簡用兩
 京大臣及家居耆舊以分璉任上摘其譌字詰之諭璉毋避
 趣赴閣璉因言漢忠謀宜令備列堪內閣者帝即令漢舉所
 欲用漢惶恐言臣欲璉引賢無私主帝怒責漢對不以實趣
 以名上漢益懼言輔臣簡命出自朝廷非小臣所敢預帝乃
 宥之奪俸一月尋出為陝西右參政告歸久之以故官起山
 西不數月復致仕橋李詩繫漢官建昌時李夢陽為江西學
 使檄毀淫祠漢一日毀十五祠居諫垣最久其疏上武廟者

三世廟者十有四責回話者二奉詔逮獄受杖者一乞歸後

自構園居曰序芳又曰常足窩海內名人作歌贈之詳地著

有漸齋集四卷奏議四卷聲承集二卷初官記耳新偶談子

伊有傳吉水曾同亨贈漢赴山西詩雁門關外羽書飛帝念

煩兵法儲行橐自請長纓出禁闈十二屯田方略在策勳看

拜徹侯歸海鹽鍾梁追悼詩漸翁明達士靈府洞無涯詩畫

奪天巧文章成大家早辭軒冕榮寓

跡一平槎放浪任所適素志薄豪奢

林桂分省人物考字天芳正德甲戌進士初授刑曹以執法

忤權貴下御史獄後世宗入繼詔拔淹滯超授禮部郎首建
 大禮之議張璉然其說上之乃桂不欲自炫璉特蒙異寵而
 桂僅以僉事終子雨有傳

陸杰程志叅兩浙名賢錄字元望光祿卿淞子正德甲戌進士授兵部主事轉員外郎中出爲湖廣叅議歷陞陝西郟延副使榆林寇警上命趙總兵將京營兵往援至則屯綏德不進杰親率標弁與鎮帥合兵出戰斬獲甚多寇遁奏撤趙兵數歲無邊烽降者日至遷廣東左布政使五嶺以南擅番舶之利杰懲犯禁者數十人民始斂輯安南貢使不至朝議以都御使毛伯溫督師征討杰預偵安南隱事爲伯溫言可不煩兵而服伯溫以聞許便宜罷兵未幾莫登庸果上表請罪補貢擢右副都御史巡撫湖廣世宗幸楚章聖梓宮南祔水陸供億浩繁杰處分若素定進工部右侍郎仍撫其地會以言致仕去久之御史王應銓疏薦以原職召還工部卒于官贈尚書杰負氣剛直侃侃不阿自爲郎時武宗南巡杰與黃鞏陸震伏闕極諫廷杖四十幾絕而甦由是直聲震天下入仕四十年歷五省十三任皆積勞序遷所至有聲爲文明潔道勁有文檄奏疏若干卷子光弼曾孫鏊嘉興府吳志光弼蔭授南都督府都事孝友能文章講學不宗禪悟鏊有傳劉玘程志叅分省人物考字廷璧一字南谷少有才名博綜今古一時目爲經筵正德丙子應天舉人授五河知縣蒞任歲大饑輸家粟以賑全活數千人五河不解織維爲造器教之時有前姜後劉吾德以休之謠六年課最擢南刑部主事

卒祠名宦

陸槐程志正德己卯舉人授陝西萬年知縣民有兄弟相訟置不理久之召與語語次在原之好曰可以人而不如鳥乎兄弟感悟訟遂解祀名宦

屠應竣分省人物考字文升號漸山刑部尚書康僖勲第六子嘉靖丙戌進士選庶吉士時張璁秉政改諸吉士為部曹應竣授刑部主事歲季秋囚當決者已三覆奏矣上疏請緩死上覽奏如所擬得全活者二十餘人戊子奉命校文江西閣大臣有屬其三子者唯唯退而曰國家百七十餘年惟貢士之法秉公不廢故巖穴之士得以自見苟徇私請將安用

選試為於是遂行至則夢人有以酖進者辭不受覆地地墳覺曰寧墳毋亂卒無所私事竣還報閣大臣怒曰屠主事侮予其以我力不能令若遠戍乎已而閣大臣竟以事罷去調

禮部歷員外郎中時上定禮樂肇建郊祠應竣應制陳言又

議薛瑄從祀皆稱旨

應制陳言疏臣等伏觀制命百官稽古議禮考天地日月羣神合祀之是非博

採羣議責之必言廣聽克讓合天下之心以奉祭祀臣等有以知陛下之事天明事地察也臣等竊聞治人之道莫急於禮禮有五經莫大於祭祭者非物自外至者也自中出生於心者也陛下慮大祀之典神祇失位聖心所格上通於天即此心也祭祀之本立矣臣等復念陛下開兼容之路而臣下犯緘默之戒誠有大不可者竊以古昔所聞并愚陋之見為陛下陳之竊惟本朝大祀之禮所可議者三而願加聖心者四夫古之郊祀其詳不可得聞矣禮曰燔柴於泰壇祭天也禮曰於泰圻祭地也周禮大司樂冬日至地上圜丘之制曰禮天神夏日至澤中方丘之制曰禮地示則天地之分祀明

矣自漢元始以後議者率合附會乃合祀天地於南郊後世沿訛襲敝墮隳古典中間分合之議迄無定制我朝統一中夏凡典章文物一舉先王之盛而祀天饗帝禮之大者顧尚求諸陰陽故冬至祀天夏至祀地日月星辰司中司命風師兩師天神之類也合之圜丘社稷五祀五嶽山林川澤地示之類也合之方丘至於六宗四望又皆有專祀焉是故陰陽定時上下定位分合有宜此百王不易之禮也后世孟春郊祀從以羣神配至于有餘位晉賀循已非之我朝創立郊殿纓以二十四壇去其淫竇之祠稽之祀法亦云正矣然日月止一從祀而朝日夕月之初制弗行神祇鬼人上下聚列而天地卑高之分未正此其所可議者二也皇祖卽位之初創制立法首建圜丘方丘於鍾山之陰陽每歲分祀天地又以仲春秋分專祀日月自十二年以後始創合祀之禮則分祀亦皇祖之舊也夫從祖而與古弗合固不若從祖而循古者之尤為愈也况王者之制多更數世而定其儀文制度亦必潤色損益而後全陛下制心禮義見其精微建中和之極宣人情之所安去百代之敝文以復三王之舊此萬世一時也此其所可議者三也臣等又竊聞之禮曰天子之祭也與天下察之是故表文以備物修德以立本其御下也蓋之如天

容之如地照臨之如日月體元育物無有疾戾四海之內歡欣交通明德馨香上帝悅豫由是宜之樂以達中心之和故郊之樂六變而天神降地之樂八變而地示出此無他致和之極也伏惟陛下懷保小民慎簡守令而郊祀之禮下詢臣工無間小大帝王之德誠無以加矣臣等竊觀制命之辭不無尚疾異同之論是以私憂過計誠恐在廷之臣或有考禮不定執論不一上干天威陛下因而怒之則雷霆之下或多摧折者其於盛德誠恐少損萬分之一伏望陛下體古聖人隱惡揚善之心用其公言容其拂逆俟彼徐考而自定則聖德益昌而感神之本無不至所謂願如聖心者一也禮又云天子卜郊則受命於祖廟而作龜於禰宮言慎之至也夫以歲郊恒典而先王至慎如此况夫創建鴻業廢百年之舊以定中興之治其可不慎哉書曰汝則有大疑謀及乃心謀及卿士謀及庶人謀及卜筮郊祀之禮陛下所謂大疑者也聖志先定卿士協從固有不待言者臣等尤望陛下告之祖考決之著龜上稽天心仰承列聖無不從矣乃命禮官稽漢時故事刊刻聖制頒之宗室及南京各省官員俾其博考古制俟以歲月各列條件上陳必待人謀僉同然後斷之睿思肇舉大禮則所謂大同之慶身其康強子孫逢吉者在是所謂願加聖心者二也國家大祀殿之制規模宏麗窮極尊奉凡人物上

百六十年來天帝降格百神萃享自近郊數十里望之鬱然
 穹窿為朝廷南面巨案今日不殿而壇則大祀殿將安置之
 萬一有所改易議及簷棟誠恐天神震驚朝野異色而小民
 無知者亦必狂視駭聽訛言相驚大非國家之利所謂願加
 聖心者三也夫殿宇既不可議室祀又非古禮則大祀殿必
 將存之而園丘之祀又必建之他方其齋宮服殿朝房樂院
 亦必創為新制與舊相等方丘之制又必與園丘相等其人
 力工價玉石土木之費必將數十巨萬况今仁壽宮先蠶壇
 起工在即誠恐今之財力有所不贍伏望陛下豫令戶工二
 部度其經費量今日之財力既周二壇之外足餘國用幾年
 然後鳩集大工成之不日則陛下制豐保大之慮周而亦無
 時絀舉羸之患所謂願加聖心者四也臣等下愚不足以對
 揚休命謹昧萬死塞明詔惟陛下垂神明之聽以無忽芻蕘
 之言天下幸甚議薛瑄從祀疏先該禮部題覆言官建議請
 以前禮部左侍郎薛瑄從祀孔子廟庶奉聖旨是着翰林院
 詹事府左右春坊司經局國子監堂上官人各上議欽此欽
 遵備行到臣臣竊惟王者褒崇聖學秩祀諸賢所以殊有道
 昭民則報功敷教不易之恒矩也陛下建德中興禮樂明備
 丕登殷典統一道真茲者復以薛瑄應否從祀下侍臣博議
 賜制臨決以加惠斯道甚厚示後世誼甚美臣誠愚昧不足

以奉休命神末論謹案瑄勤學好古講道授徒進無比周退
 無顧望居位盡職行誼卓然其所著讀書錄篇帙雖簡要皆
 周程朱子之格言反之於身冲然篤悟內不自誣外不誣人
 固聖學之流宗儒者之遺範也或者乃曰從祀以報功貴釋
 經以衛道臣至愚昧竊謂不然夫孔子所以刪定六經垂之
 萬世者固欲學者博求蓄德飭已反躬知性修身由微至著
 於是聖人之功化可幾也豈徒垂空文資誦法令後世知有
 經籍云爾哉去聖既遠重遭焚坑之禍道術遂廢當其時能
 補緝舊文修明六學使聖人之言不絕於世後之行道者猶
 有所持循則二十二經師之功也宋儒彙興微言盡發道學
 章明迄至於今無所失墜煥乎不待論說而後顯苟能奉爇
 訓慎力行求無叛於道斯已矣雖馳辯若綴華反無益於支
 離也是故議賢以祀也漢晉貴傳經本朝尚篤行所值之時
 異也瑄雖無所註釋至其律已處官之狀求之聖朝可謂篤
 信好學有所不為者矣臣又惟今之儒者非無所論述之難
 也黨異伐同抑古自是剝經傳之緒餘以肆其曲說詆譏儒
 先等末失源言有枝葉其流將離經背道為世大疵無乃學
 未育獲而空言以眩世者之過歟如瑄者斥言任行斤斤不
 踰且當科目詞章之餘岷然奮起卓越自信卒為本朝理學
 名臣稱首顧不異哉夫古之有道德者生使教焉沒則以為

人物上

樂祖祭於瞽宗宣流風遺行為當世所推得自聞見以之侑
 坐孔庭明示崇顯寶昌文之公議昭協之令儀且與古祭於
 瞽宗之義合臣愚以諱瑄從祀改翰林院修撰等奉命校累
 可惟聖明俯賜裁擇折衷羣言

朝寶訓寶錄進侍讀經筵先是交趾弗靖幾二十年詔廷臣
 議有才望者往諭之廷舉應竣應竣奮然而起曰臣無橫草
 之功幸侍講幄得奉使命當宣天子威德聲萬里外不亦偉
 乎頃之竟罷遣使云等陞春坊右諭德時春宮初建慎簡僚
 案而諸臣幸有滙恩覬為宮僚者甚眾於是給事中御史槩
 論諸宮僚應竣亦在論中章一再上所論十八人者皆罷免
 有旨獨留應竣或謂之曰天子方知君誠以此時奏賦頌必
 得近幸喟然曰臣蒙恩待以不誅雖捐軀暴骸無以自効迺

欲乘機徼進邪素修謹橫被口語頗懷不平且耻不自表見
 遂抗疏乞歸歸而疾作竟不起應竣雅好文史雖疾甚不釋

手為文奇宥有司馬子長楊子雲之風著有蘭暉堂集八卷

載明史子孟元仲律叔方孫謙曾孫襄孫孟元封吏部主事

藝文志仲律叔方有傳謙隆慶戊辰進士官山東提學副使襄孫萬

歷乙卯舉人終刑部郎中橋李詩繫應竣同時吳縣袁永之

晉江王道思慎中並有盛才皆與之友其學日益闕尤長於
 詩諸體雄麗允為七子開先生平好為奇節豪宕風發飲酒
 百鍾不醉又好內後庭多稚齒媿媿之人卒以病廢方應竣
 之生也康僖筮之得震之漸曰鸞德如玉飛上高木鼓其羽
 翼光照四國及歲乙巳夢謁衡山君有書在廡間曰明年正
 月十三日官至二品增年一紀晨起呼諸子曰我始將死矣
 我宦遊二十年官不踰五六品二
 品增紀者其易歲之兆乎如期卒

按明史應峻與王慎中合傳列文苑

陸鰲程志叅朱志字子任號南溟九歲有悟人稱小象山嘉靖戊子舉人授江西臨江府通判江盜橫甚單騎諭降之當事復議勦鰲爭曰已降而勦何以信民令而不信民始疑矣殺降不仁疑民不智有死而已不敢奉命乃寢督儲使者至屏其贈金使者怏怏忽排闥入唯見圖書數卷歎服而去署新淦值亢旱禱于蒙山龍祠徒步涉險裂足流血刻期雨至遷南康府同知淦民思之累贈江西巡撫右僉都御史子萬垓有傳

姚筐朱志字希實工部郎中參子嘉靖辛卯舉人授江西廣信府推官治獄明允創築玉山城置戍分水溫陵相水三關曠徒山賊不敢嘯聚南安界嶺表素號難治筐承檄往理夙弊盡滌遷宿州知州招撫流亡給牛種墾田四千頃贖鬻子女幾千人捐宿逋二萬五千立社倉以備凶年教民機杼至今賴之更秦州守尋陞南刑部郎中擢貴州僉事乞休歸治園于金章湖上爲逸老計卒贈太常寺卿孫士慎有傳孫校朱志字右文嘉靖壬辰進士兩執喪不入城市故業悉讓予兄弟初授工部主事辭荆南權稅裁革諸司羨餘省大工煩費轉兵部武選郎中武弁賄請悉謝絕忤嚴嵩謫廣東提舉轉衡州府同知歷南刑部郎中改吏部尋轉四川副使

出淹繫撫豪酋平徭減賦以瘁乞歸

馮汝弼獻徵錄叅程志字惟良號祐山嘉靖壬辰進士授行

人遷工科給事中奉命視光祿及盛甲厥劾中人張時等下

獄吏部尚書汪鉉恃寵驕恣言官爭之不得汝弼投袂起曰

擊之不勝則其志益驕事有不可言者吾當以死爭上疏列

其罪劾汪鉉疏近該科道等官薛宗鑑等交章論劾吏部尚

書汪鉉罔上徇私等事隨該鉉自陳伏蒙陛下睿旨勉

留鉉續自陳兼致辨許奉聖旨卿受銓衡重托又方督理大

工宜照前旨即出供職人言不必深辨欽此臣惟鉉之奸邪

聖明在上固已洞察之矣然猶拳拳慰諭至再至三不遂屏

逐者非為鉉惜惜夫大臣體貌以全始終之義耳臣竊以為

納污含垢不輕絕人帝王包荒之仁也遠佞除奸不使病國

帝王遏惡之義也陛下以堯舜之仁覆冒於上而工繇之惡

錮蔽不悛日增月益以自珍絕則流放竄竄堯舜之義亦豈

可終廢哉鉉被論劾例該自陳乃復強辨且自譽曰至公無

私從前所未有何其大言無恥欺君罔上一至此極雖然其

謂從前所未有則誠是矣臣請昧死為陛下言之往年大同

之變鉉為元宰義同休戚乃遣其子盡歸貨寶空室以觀成

敗是心也其於陛下之休戚如何也則鉉乃背德負君保家

忘國從前所未有者也鉉於大學士張孚敬召入則附之及

其罷歸則背之迨其再召則又附之孚敬惡其反覆不為禮

憚之為耳昔編修楊名具疏上于聖怒鉉遂乘機論奏欲將
劾已科道等官斬首以正國典夫劾鉉科道自鉉視之則為
罪自朝廷視之未必不為忠乃欲斬朝廷之忠臣以洩私憤
鉉無朝廷久矣自有史冊以來民臣碩輔有導其君以殺諫
臣者乎惟王鳳之於王章則有之矣然非聖世之所宜聞也
陛下天地含容不即誅譴今復鼓其餘奸肆為許構夫臺諫
陛下之耳目所有論劾無非為陛下明目達聰以決壅蔽焉
耳諸臣知有陛下而不知有鉉是故論鉉而無懼鉉知有已
而不知有陛下是故以諸臣為私忿為偽黨而許構不已臣
任行人二年入科八月既無恩怨亦寡交游又何忿何黨而
論鉉若是蓋叨陛下耳目之司誠惡夫奸臣之壅塞佞臣之
欺蔽是故列鉉之罪發鉉之奸使不得聾瞽陛下之視聽以
播其惡於天下耳至其事之有無罪之輕重聖明聖斷鑑空
衡平無所於逃諸臣何與焉鉉亦何與焉鉉乃妄為辨許欲
陛下為之考驗參酌以施乾斷則是臺省為聚訟之地科道
為構訟之官彼此株連動相劫制元凶極惡誰復敢言君門
萬里何由聞見於是罔上行私欺君誤國之臣始得竊榮寵
以終身鼓威福以恣惡陛下何以大中興之治天下何以蒙
至治之澤哉伏望皇上大奮乾綱俯從輿論將汪鉉竄逐勿
疑更選公忠清亮人望所屬天下第一流用秉銓衡則大奸

去而羣陰屏伏正人進而眾賢和衷聖朝中興之治有賴太平之基在是矣

鉉罷汝弼謫南直潛

山縣丞潛無志汝弼創成之陞常熟知縣築葉蕩等閘立法

均田減耗數萬調餘千核虛糧悉去之監司頒其式陞南直

太倉知州革富民供應有劇盜聚江海間前守不能詰設方

畧擒之復襲擊其黨歲稔部使督逋株連給之行悉縱之既

轉揚州同知而前使者以逋稅復論謂乃喟然曰世道如是

安能賸民脂要仕譽耶既歸以常熟均田法告趙郡守瀛以

太倉均役法告顧邑令廷對行之為邑永利值倭寇發海上

往言于督府請城平湖首輸為眾倡及寇至賴城守得全築

漢塘五十四里土石橋堰四十餘所歲葺之

汝弼漢塘紀事嘉靖辛酉冬余

行自漢塘至郡忽風雨大作見兩涯斷岸泥濘僕夫率輓及行道徒涉顛頓入水前後相繼飄泊有至不起者余不忍見也歸辦竹木輓石沿隄修築五十餘里不終歲而竊取圯壤者居多自是十餘年時圯時葺即今萬歷開天余年七十六矣自念去日苦多恐不能為久長計於是蓄料鳩工修建石梁木梁三十二座修築石堰土堰一十五處余自歸田以來上愧國恩下慚民隱見聞所及不容自己為吾子孫者稍有餘力當世世葺之若其未備則不能無望於吾邑同志諸君子邑災賑米數百瘞孳屍立義冢族屬親故貧者為代舉婚喪年七十九卒邑人請特祠之累贈山東叅政著有補備遺錄一卷紀建文時事祐山集十六卷

載明史藝文志

三蘇文纂史案

若于篇子敏功敏効各有傳

俞咨伯嘉興府劉志字禮卿幼穎異弱冠中嘉靖壬辰進士歷官工部營繕屯田司員外時貴戚武定侯專權咨伯奉法

惟謹不少徇出為福建泉州知府值歲饑疏請賑活者甚眾尤加意學校諸生邱有崑貧不能婚乃為捐俸娶之卒登第尋以河南副使轉山西提學甄別不爽遘疾歸卒於家年僅三十六

王梅程志叅馮祐山文集字時魁號柘湖嘉靖壬辰進士選庶吉士改刑部主事嘉靖十五年建昌侯張延齡下獄刑部主事沈椿以戚晚故不令入重獄代者踵之事發前後提牢官二十四人俱下鎮撫司獄擬杖梅與焉謫南直滁州判官卒于官梅才氣豪上嘗言人生如白駒過隙所賴以不朽者功業文章耳若碌碌窮年虛生虛死與蠛蠓何異每與馮汝

弼俞咨伯終日論難至忘寢食或對榻劇談輒至夜分著有

柘湖遺稿歿後五年汝弼守太倉為之刊行元孫潔順治戊

戌進士稿李詩繫梅在滁時縱情山水興會所至發為詩歌

使千載下猶想見其人陸啟滋讀王庶常集詩庶常籍金閩

漢庭尚寂寞鬱鬱古雅資不得登著作憔悴一官難詩魂更

天折孫子負薪行若敖安所趙伊嘉興府劉志叅朱志字子衡陝西叅政漢季子弱冠舉

嘉靖壬辰進士授刑部主事陞南兵部職方司員外尋轉武

選司中山王後徐錦衣某以傳奉得官法不得襲附嚴嵩曲

得上旨伊爭不可拂衣還久之起南車駕司置郵關符查禁

甚嚴要路嫉之擢廣西按察副使年方四十乞終養歸隆慶

萬歷間再三召卒不起惟日遊湖山賦詩自娛有序芳園稿

二卷子邦秩邦程邦叅孫琮邦秩字元叙以孝聞年十五博

通經史萬歷丁丑進士授南直海門知縣均賦減戍築呂四

堤開鹽運河以勞卒官士民特祠祀之稱伯林趙公祠邦程

字元憲南直蘇州府訓導吳士矜式遷連城教諭歸邦叅字

元美嘉靖戊子舉人任江西南安府推官多所平反權關南

贛溢額四千餘金佐公帑以母老乞歸琮字伯裕邦秩子博

學以周易入泮春秋食廩禮記選貢書經中萬歷己酉順天

舉人又改毛詩著葩經約說十卷載明史署高陽教諭卒于

官

陸山程志字子周以貢選山東臨清州判請罷馬草散腐易
新至十有八萬擢北直阜平知縣值水患民多逃徙力請上
官奏免田租之半又請增弟子員文教大振尋調山東夏津
縣遷光祿署正忤權要歸讀書自得著有孝經正義太極直
解明吾篇等書子萬源字天澄由南雍乙榜授光祿署正性
孝友父病篤跣足徧禱祈減算益壽及居喪廬墓哀毀傷性
爲其父建陸孝子祠于東湖濱周卹親族婚葬舉火施無倦
色當事重其德行五舉大賓

曹校高志纂字世儒號鵝川由選貢授光祿寺丞性至孝生
乎樂善好施尤篤宗誼子光煒光有傳煒萬歷丁丑進士任
知縣

陸炳明史字文明祖塋以軍籍隸錦衣衛爲總旗父松襲職
從興獻王之國安陸選爲儀衛司典仗世宗入承大統松以
從龍恩遷錦衣副千戶累官後府都督僉事協理錦衣事炳
武健沉鷲長身火色行步類鶴舉嘉靖壬辰武進士授錦衣
副千戶松卒襲指揮僉事尋進署指揮使掌南鎮撫事十八
年從帝南幸次衛輝夜四更行宮火從官倉猝不知帝所在
炳排闥負帝出帝自是愛幸炳屢擢都指揮同知掌錦衣事
未幾擢署都督僉事又以緝捕功擢都督同知炳驟貴權日
益重仇鸞得寵陵嚴嵩出其上獨憚炳炳曲奉之不敢與鈞

禮而私出金錢結其所親愛得鸞陰私及鸞病亟炳盡發其
 不軌狀帝大驚立收鸞敕印鸞憂懼死至剖棺戮屍炳先進
 左都督錄禽哈舟兒功加太子太保以發鸞密謀加少保兼
 太子太傅歲給伯祿三十三年命入直內苑與嚴嵩朱希忠
 等侍修元三十五年三月賜進士恩榮宴故事錦衣列于西
 帝以炳故特命上坐班二品之末明年疏劾司禮中官李彬
 侵盜工所物料營墳墓僭擬山陵與其黨杜泰三人論斬籍
 其貲銀四十餘萬金珠珍寶無算尋加炳太保兼少傅掌錦
 衣如故三公無兼三孤者僅于炳見之炳頗結權要然周旋
 善類亦無所吝帝數起大獄炳多所保全折節士大夫未嘗

構陷一人以故朝士多稱之者三十九年卒官贈忠誠伯諡
 武惠祭葬有加官其子繹為本衛指揮僉事隆慶初用御史
 張守約言追論炳詔削秩籍其產奪繹及弟太常少卿煒官
 坐贓數十萬繫繹等追償久之貲盡萬歷三年繹上章乞免
 張居正等言炳救駕有功且律非謀反叛逆奸黨無籍沒者
 况籍沒追贓二罪并坐非律意帝憫之遂獲免朱志錄其孫
 達為錦衣千戶世襲

沈一卿朱志黃梅教諭鑰季子鑰課士有法荆王慕其高節

請于朝嘉靖甲午勅封一卿為中奉大夫宗人府儀賓尚荆

王崇明郡主盧生甫東湖乘一卿隨父任適荆王崇明郡主

及笄將選儀賓故事官其地者子弟皆得送選

及斯王與郡主皆御樓選者數十人集樓下人各一席一卿
意不在選舉箸大啖餘皆彬彬爲文雅態王舉目周覽語郡
主曰汝意何屬主顧一卿王曰我意亦然坐如山食如虎是
人有厚福一卿食猶未已宮女捧彩毬自樓擲下直墮懷中
宮監捧而入衆皆駭散王具章入奏初授上士秩三加乃至
儀賓始尚主後寵歸老主告假夫婦率宮眷百餘人舳艫相
屬至虹霓堰奉養其親造屋千餘間自沈氏之居以
達於塘不下里許三年然後去子孫遂爲湖廣人

按朱志一卿與陸炳同編勲爵高志改入文苑今勲爵不
另立門一卿又無著述故附列傳其官階從程志補

沈垣獻徵錄參程志字子完嘉靖乙未進士授大理寺評事
歷寺正參駁平允錄囚廣西出寃民劉榮等七十餘人出知
廣東惠州府府介嶺海僅攜三僕抵治事至立斷務得民情
有李鑑者和平劇盜也負險剽掠垣設方略調兵餉遣人入

巢諭禍福鑑自縛降餘黨立散詣省中瘴癘卒于番禺官舍
諸僚佐檢垣篋圖書外無長物惠人德之祀名宦

孫植嘉興府劉志參朱志字斯立號蜃川山西僉事墮子嘉
靖乙未進士授南刑部主事申官潘珍從子怙勢爲奸都指
揮楊起昕乾沒慈慶諸宮費悉正其罪尋以父疾終養服闋
補兵部歷光祿少卿祠官祝釐費多不經植爲簿正巨璫耿
清至以鐵人稱之尋擢右僉都御史總理河道轉刑部侍郎
庚戌之變奉命守崇文門時孫少卿分守外城以調兵不至
疏劾本兵楊博夜呼崇文門甚急植以博素習邊事却其疏
不納而亟遣騎馳報趨發兵時多其功旋轉南右都御史掌

院事正已率下諸御史無敢毛舉苛細隆慶初詔與吏部尚書毛端簡考察京朝官中外稱服陞南刑部尚書中人王采盜伐孝陵樹邢保侵剋工匠銀張進朝詐傳詔旨選宮嬪皆據法論抵尋以勘徐氏獄罷歸初魏國有七子而無適庶長邦瑞當嗣幼子邦寧母嬖欲干爵先請封其母鄭詭云繼適邦瑞訟言邦寧券許助教鄭如瑾千金謀奪爵大司成姜寶疏論事下南法司植會諸曹雜治辭具大略謂邦瑞宜嗣如瑾以儒官納交勲胄宜免官魏國徇情溺愛宜罰鄭氏娶于適夫人存日誥命宜追奪讞上輿論翕然時新鄭高拱再起方修競于徐文貞階以植寶皆文貞門人而如瑾爲新鄭鄉

試所取士護之部徇其意脫如瑾司成坐贓給事中王楨遂撫蜚語劾植奉旨冠帶閑住植終不自明家居十七年撫按前後疏薦召起工部尚書上疏引年以原職致仕卒賜祭葬

贈太子太保諡簡肅著家訓一卷

載明史藝文志

子成名成秦有傳

陳善道嘉興府劉志字敬夫嘉靖庚子舉人授江西德安知縣築城以脩流寇民有奸法者警治之尋倅廬州掌錢穀不私贖鍰陞南直松江同知撫治小民嚴治逋首所創規條俱可遵守歸田二十餘年布衣蔬食不減寒素自謁選時有田二頃歸而如故清節可想見云孫泰來有傳

陸杲程志字元晉嘉靖辛丑進士授刑部主事理漕撫刑執

法不阿與漕臣左會漕臣罷官杲亦罷略無愠意且曰得砥
修禮訓以式鄉閭豈不若一官耶乃倡諸子置田入百畝歸
景賢祠歲收其入以周族人謂之族田又置田五十畝歸世
德祠畀宗子供禴祀謂之祭田羣里族之子弟置塾講業置
田二百畝以給稍廩謂之學田宗族日繁更徭不支置田三
百畝分贍之謂之役田嘉靖中島夷內寇捐貲佐築城費邑
人賴之年七十三無疾端坐而逝累贈刑部尚書子光祖光
祚光宅各有傳

陳謨程志幼失怙嗣伯父鼎四列副榜聲稱藉甚嘉靖間貢
于鄉部試第一授南城兵馬指揮改長蘆運判攝使事土城
傾圮盜入劫庫謨引頸就刃曰俸可得庫不可開盜亦解去
尋致政不能治裝僚友助之歸晚乃築穴于嗣父側曰我如
他穴後世子孫或以父非本生踈于拜掃人服其始終完孝
子志道字凝甫以貢選南直長洲縣丞有私以金者撫膺示
之其人慙退期年掛冠歸太守檄留之扁舟已抵舍矣著有
惜陰銘秋夜吟喻世格言歿之日整衣冠自題其像翛然以
逝

俞乾程志字一清九歲能屬文里中稱神童性至孝居喪廬
墓三年中嘉靖甲辰進士授刑部主事秉公執法勢豪犯重
辟者夜懷金賚緣中貴人以請乾竟致之理時嚴嵩傾夏文

愍言論死西市乾適監刑義憤發中忽仆地移時始甦遂乞
歸眾憐其貧贖之悉不受楊忠愍贈詩有直道難容君有去
孤忠自許我無生之句抵家二日卒乾歸興詩眼見沉冤閉
九閭挂冠春盡出金門

而今拂袖歸鄉曲
不用書籤付子孫

陸光祖明史字與繩號五臺年十七與父杲同舉于鄉尋登
嘉靖丁未進士除河南濬縣知縣兵部尚書趙錦檄畿輔民
築塞垣光祖言不便錦怒劾之光祖言于巡撫請輸雇值民
乃安郡王奪民產光祖裁以法遷南京禮部主事請急歸補
祠祭主事歷儀制郎中嚴訥為尚書雅重光祖議無不行及
訥改吏部調光祖驗封郎中改考功王崇古張瀚方逢時王

一鸚挂物議力雪之既而改文選益務汲引人才登進者碩
幾盡又破格擢廉能吏王化江東之邵元善張澤李珙郭文
通蔡琮陳永謝侃或由鄉舉貢士或起自書吏由是下僚競
勸訥亦推心任之故光祖得行其志左侍郎朱衡銜光祖有
後言御史孫丕揚遂以專擅劾光祖時已遷太常少卿坐落
職閒住大學士高拱掌吏部謀傾徐階階賓客皆避匿光祖
獨為排解及拱罷楊博代為吏部義之特起南京太僕少卿
未上擢本寺卿又就進大理卿半道丁父艱萬歷五年起故
官張居正以奪情杖言者光祖遺書規之及王用汲劾居正
居正將中以危禍光祖時入為大理卿力解得免居正與光

祖同年相善欲援為助光祖無詭隨及遷工部右侍郎以議
 漕糧改折忤居正御史張一鯤論之光祖遽引歸十一年冬
 薦起南京兵部右侍郎甫旬日召為吏部悉引居正所擯老
 成人布九列李植江東之力求居正罪光祖言居正輔翼功
 不可泯與言路左植輩以丁此呂故攻尚書楊巍光祖右巍
 詆言者言者遂羣攻光祖乃由左侍郎出為南京工部尚書
 御史周之翰劾光祖附宗人炳得清華帝不問御史楊有仁
 遂劾光祖受賕請屬巍力保持之事得寢光祖竟引疾去十
 五年起南京刑部尚書就改吏部率同官劾東廠太監張鯨
 止乞宥李沂已言國本未定由鯨構謀請除之以安宗社及

帝召還鯨復率同官極諫

定國本疏竊惟人主能擅千萬年之崇名者莫先於去大奸培千萬

世之鴻業者莫急於定大本去奸存乎斷定本貴乎豫然二
 言者非聖武神明之君弗能納也而臣幸逢聖武神明之主
 亦何憚而不言乎近者司禮監太監張鯨智足通神富能敵
 國誠天下之大姦也皇上燭其姦而屏之私宅矣顧不出都
 城則易通關節退間日久則將復營求又鯨黨與心腹揚言
 惑眾謂皇上蚤晚必復召入臣等數千里外竊料聖明之必
 無此事也但鯨之險惡實有諸臣之敢怒而不敢言者則事
 關宗社臣請不避斧鉞昧死為陛下陳之夫元儲者九廟之
 所憑托萬方之所瞻依所謂天下之大本是也皇上三年前
 冊立已有成命矣所未即宣明詔者蓋欲擇吉以待時耳內
 外臣工皆知聖心久定候旨遵行惟獨張鯨變計多端混淆
 觀聽欲邀非望之福罔恤非常之禍誠恐愚民無識以訛傳
 訛萬一有干紀之夫更相煽動或釀他虞此又臣之所大懼
 也故張鯨一日不去則朝野之人心一日不安皇儲一日未
 建則祖宗之神靈一日未懌天下安危之機繫於是矣陛下
 奈何不割棄造孽之小豎而深圖保祚之長計乎臣歷觀前
 史凡宦官之奸者小之則私布外交公行貨賄大之則潛結
 內援動搖國本公行貨賄者蕩敗官常動搖國本者傾危社

稷今張鯨蕩敗官常諸臣已言之詳矣而鯨之傾危社稷則臣之所謂敢怒而不敢言也臣等久荷聖恩職司刑憲且衰殘老病報効之日甚短若心知國家之有隱憂而不盡言悟主與銷禍萌一旦身填溝壑其目不能瞑也伏祈皇上蚤發宸斷將張鯨依部擬明正刑章或竄逐遠方絕流議以安百官萬姓之心仍勅各部大臣恪遵前旨豫上冊立事宜候陽春熙泰之時應天順人舉行盛典入爲刑部尚書帝嘗書其則四海歡騰寶祚有無疆之慶矣

名御屏吏部尚書宋纁卒遂用光祖代而以趙錦代光祖御史王之棟言二人不當用帝怒貶之棟雜職時部權爲內閣所奪纁力矯之遂遭挫光祖不爲懼嘗以事與大學士申時行迕時行不悅光祖卒無所徇時行謝政特旨用趙志臯張位時行所密薦也光祖言輔臣當廷推不當內降帝命不爲後例二十年大計外吏給事中李春開王遵訓何偉丁應泰

御史劉汝康皆先爲外吏有物議悉論黜之又舉許孚遠顧憲成等二十二人時論翕然稱焉頃之以推用饒伸萬國欽忤旨文選郎王教以下盡逐光祖謂事由已引罪乞休爲郎官祈宥不許及會推閣臣廷臣循故事首光祖名詔報曰卿前請廷推推固宜首卿光祖知不能容日懷去志無何以王時槐蔡悉王樵沈節甫老成魁艾特推薦之給事中喬允遂劾光祖及文選郎鄒觀光光祖遂力求去許馳驛在籍五年卒贈太子太保謚莊簡光祖清強有識練達朝章每議大政一言輒定初官禮部將擢尚寶少卿力讓時槐不揚劾罷光祖後再居吏部推轂之甚力趙用賢沈思考以論此呂事與

光祖左後亦數推輓之御史蔡時鼎陳登雲嘗劾光祖光祖引登雲為知己時鼎視蹉兩淮以建言罷商人訐于南刑部

光祖時為尚書雪其誣罪妄訴者人服其量

明稗類鈔陸光祖初為濬令濬

民盧構富而才忤前令誣以重辟數十年相沿以其富不敢為之白陸至訪實即日破械出之然後聞于臺使者使者曰此人富有富聲陸曰但當問其枉不枉不當問其富不富果不枉夷齊無生理果枉陶朱無死法臺使者甚器之後行取為吏部黜陟自由絕不關白臺省時孫太宰丕揚在省中以專擅劾之既落職辭朝遇孫公因揖謂曰承老科長見教甚荷相成但今日吏部之門囑托者眾不專何以申公道老科長此疏實悞也孫沈思良久曰誠哉吾過矣即日草奏自劾夫言而力薦陸陸由是復起時兩賢之朱志子基忠基恕基志基忠字伯貞以廕授兵部司務時寧夏甫罷兵東援朝鮮李中丞清正為小臣所攻基忠俱抗疏極言遷刑部郎中治指揮鄭光耀獄癸

卯妖書事起禮部侍郎郭正域被誣基忠獨周旋不避陸氏

向有義田贍族基忠上疏請世世蠲役報可欲復西湖忠宣

公祠當路格不行以勞憤成疾卒後十年始伸輿論快之基

恕字澹園以廕任工部郎中有膽幹以宦績聞基志字季高

莊簡側室支氏出莊簡沒諭祭賜葬基志痛生母不得耐赴

京乞恩就詹事府主簿母獲邀封命母卒奉莊簡衣冠合葬

創惠宗祠於景賢祠後祀司寇杲以族之捐田及有功於祠

者配年七十八卒無子遺命不立後盡以產授兩姪耐祀長

房

樵李詩繫光祖卒之夕海上星隕如斗擊地有聲

韓弼分省人物考叅西江志字汝良號懷南嘉靖丁未進士

除江西豐城知縣明察威嚴政多奇績築堤塘創條鞭法民

利之豐城縣志弼令豐時有醉人入酒肆遺金醒忘其處詣

批拘酒戶楊勝三人審告訊曰此無頭事誰命汝來曰禱神得筊一陽三聖即

一訊得金稱神明焉後知南昌府值景藩就國請費羨餘

民得不擾閩廣流寇將逼境亟議城豐躬自相度慰藉士民

財不督而輸力不驅而集三閱月工竣寇警恃以無虞擢江

西提學副使即掛冠歸卒嗣子子祁有傳

曹光朱志字原實號賓湖嘉靖庚戌進士授中書舍人選福

建道御史巡十大庫督蘆溝橋都御史屠簡肅首錄其功嚴

嵩柄國光以諫開馬市謫湖廣都事歷陞福徽州司理轉袁

州郡丞陞南京刑部員外禮部郎中丁艱起北京工部郎中

出知汀州府陞福建都轉運使遂解組歸家居二十年杜門

謝客生平雅慕司馬君實為人故自號原實孫穎洵穎洵穎

洵天啟丁卯舉人官江西永豐教諭穎洵崇禎壬午舉人

屠仲律朱志纂字宗豫諭德應竣次子嘉靖庚戌進士授江

西弋陽知縣擢南御史值島倭入寇仲律條奏禦倭事宜倭禦

五事疏畧一絕亂源夫海賊稱亂起於負海奸民通番互市

倭人十一流人十二寧紹十五漳泉福人十九雖槩稱倭其

實多編戶之齊民也臣聞海上豪勢為賊腹心標立旗幟勾

引深入陰相窩藏展轉貿易此所謂亂源也曩歲漳泉濱海

居民各造巨舟人謂明春倭必大至臣初未信既乃果然故

禦盜之標在腹裏防守弭盜之本當邊海制之邊海諸處漳

泉福為始而寧紹次之其一禁放洋巨艦其二禁窩藏巨家

其禁下海奸民三法者立而亂源塞矣即使舊賊未盡殄

滅然而後無所繼其勢自孤退無所歸其情知懼與今日往

來自若者必不同矣二防海口夫海固涯涘無際然賊泛海

來犯放洋則衝濤入口則起陸非可絕險而徑渡也故其往來所由出入可設險防拒者姑自浙東西大江以南濱海數郡言之入平陽港則近金鄉入黃花澳則近盤石而逼温州入海門則越新河而寇台州入寧海關入湖頭灣則窺象山定海而瞰寧波入三江口則搖尾於紹興入鼈子門則垂涎於杭州入乍浦碇則流毒於嘉興入吳淞江則犯松江入劉家河入七了港則寇蘇州此其大勢也中間經行或潛形於馬蹟山或遁跡於大七洋及大小衢上下川則其要害也此沿海諸郡之通患也故守平陽港拒黃花澳據海門之險則不得犯温台塞寧海關絕湖頭澳遏三江之口則不得窺寧紹把驚子門則不得近杭州防吳淞江備劉家河七了港揚威馬跡大七洋大小衢上下川諸險則不得掩蘇松嘉興此皆險地一處失守蔓延各處不可以彼此分遠近異也且賊長於陸戰短於水鬪以其船不敵而火器不備也在我宜用所長棄所短則莫若恃海船請以見在把總船隻通行查齊不足則令福建如法添造或即令邊地方買補每大小船百隻或五十隻號為一隊募以習舵工水稍而充以原額水軍於前諸海口各量緩急以為置舟多寡又為遊艦數綜分布上流往來要害海軍芻糧衣甲之給比陸軍加優令其更番巡邏併力捍禦來過其衝去擊其惰責以毋令賊入賊

入而力拒有功者陞賞其失備者重寃此禦倭之長算也故法不可不厲也三信賞罰臣聞倭之入也豈盡無軍之患蓋有有軍而移入便地者矣有失於巡哨者矣甚有買渡報水受其鈎餌者矣若此則地方奚賴焉夫百處守之一處失之無益也千日防之一日疎之無益也是在督撫及海道諸臣明信其賞罰耳夫荷戈戟戴介冑爭鋒死刃者將士之能也保封域固郊圻全境安民者守令之任也今之守令不肖者棄城守走矣其賢者大率遇警則嬰城守耳其關廂村落委之無可奈何夫城之外獨非赤子乎且邊海孤城猝然無備猶可諉也腹裏巖都江南奧壤寇非可長驅而卒至者顧不能設險預防使徜徉去來若履無人之境則國家建邦設邑張官置吏將焉用耶自今江南守令之職當以訓練土兵保全境土為殿最仍勅吏部凡遇沿海守令員缺必慎擇其才且賢者然後授之庶保障足賴耳四議調發近日徵調各處兵民遠近四集徐邳山東永保川廣及軍門編調各府義勇無慮數萬然師老財殫竟不見膚功之奏者臣請指諸臣不善用兵之弊陳之夫古者用兵潛機密計電馳霆擊進退倏忽妻子莫聞所以能有成功也今則先發後行尅期始動前軍未啟而先聲已聞其弊一也古者名將筭不百勝不敢輕動今也謀不預成計不先定冥行突進動陷伏中其弊二也

守不據險屯不列要奔急救難賊逸我勞其弊三也法曰夜戰聲相聞足以相救晝戰目相見足以相識權愛之心足以相死言兵之貴熟習也今也兵不專一主客雜聚卒遇狡賊易去變飾突然來前不能別識其弊四也兵無素統將不預其弊五也夫三軍之衆所以冒白刃蒙矢石至死而無敢却顧者威行之素也今法令姑息紀律不肅進有必死之恐退無伏鑽之慮是以畏敵而不畏將其弊六也地形不習險易不識趨利不及避難不早其弊七也糧糗不儲料理不周遠兵勞役撫恤未至榜腹待斃窮愁思歸其弊八也士不精選勇怯無辨前擊後懈謹然而散雖悍夫勇士或以無援而力止或見先奔而胆喪其弊九也地狹人衆不能旋轉互相排擠雖有勇敢無以效其所長其弊十也十弊不去雖頗收捺刃責育執戈莫能濟矣近日汀州如賴百戶兵敢死先登足當一面以不善用之使頭領陣亡軍士逃遁如此則徵兵雖多亦何益哉夫賊非有遠畧大志約束號令不過羣聚為奸利在貪淫耳所以禦之則非兵少之憂而實寡算之患蓋欲防盜者必知盜情欲制盜者必怵盜心故必詳謀而熟計之然後成功可期也五作勇敢沿海如沙民鹽徒打生手及村莊悍夫皆勇敢可用然多樂效用於私室而不樂報名於

公家何者以公家勢遠而役繁也豪民以之保村里則有餘以之充行伍則無益何者以行伍之多而心力渙也然則順其情相其宜以振作鼓舞之必有術矣乞勅下各該有司通諭豪家大族及里巷豪傑各為身家併力拒守其有能團結鄉民保固村鎮者先與免其糧里押運重役及均徭一應雜差獲功者一體陞賞其有願受文職審其果能保鄣一方及斬首十顆以上民得比輸粟例入監係有職役者並得起送赴部與本等常選陞授閭里之人並得以其功累增至赴部實選其不願官爵者則重給賞優恤之或亦制賊之一策也近蘇松嘉湖之民常有糾集智勇乘賊怠玩或掩其昏暮間能殺賊奪其輜重隨為官軍劫其財而奪其功夫居民出百死之力卒被劫奪會不獲分毫之報不亦激衆怨而失民心乎又有村民團結自相防護志在全家保妻子耳有司輒謂其能遂報名入官以致人各畏避不敢復謀拒賊此又沮民之氣而抑其忿也請諭地方官凡義民不願在官者不得一切附報且嚴禁官軍不得攘奪民功則民見利而動無畏而奮將各思所等出知南直廬州府時軍興浩費更值景王之國郡邑騷然伸律一意節省費減他郡十之五歲大稔民多

通稅爲出贖緩代償又出積穀數十萬平糶全活甚衆以勞瘁卒于官

陸光祚嘉興府劉志叅朱志字與培號湛菴吏部尚書莊簡光祖弟嘉靖己未進士授兵部主事中貴戚畹奴隸竄籍府軍者盡汰去時伯兄典銓引疾歸起補禮部歷三司建明皆關大體隆慶間屢疏請皇太子出閣講讀詔取光祿銀十萬抗疏止之疏復屯田通錢鈔練土著去冗耗倡節儉五事慮宗祿不支上疏請限服制開生業嚴法禁諡法錫典過濫奏爲條例肅懷王無後堂叔越序乞嗣固爭不與南陵王絕周王覲獲遺貲疏請補宗室祿兩事忤柄臣出湖廣副使改陝

西提學校文稱得士然以是成疾卒于官生平清亮淳樸所生母亡故事無去官持服者光祚以請不俟報可而行嘗買一妾知爲故家女厚遺遣還之有湛庵遺稿

陳九疇程志字天錫嘉靖辛酉順天舉人署北直昌平州學正卻贄賑貧勤課造士知平鄉縣值水災設法全活者甚衆陞保定府通判所督屯馬悉汰陋規轉知上石西川地多土司勦撫互用無何歸年七十一卒之夕猶嘯傲詩酒弗輟云馮敏功獻徵錄叅程志字元卿號小山揚州同知汝弼長子嘉靖壬戌進士授禮部主事歷員外郎中出爲江西叅議會浙兵挾餉鼓噪南豐敏功召其長好語之曰而我鄉人也若

所為名曰賊天子檄大軍至蓋粉矣餉不足吾為若給令登舟受餼以一倅導其前勒勁卒制後兵乃戢陞淮徐副使脩兵徐邳是歲河溢睢寧新安間大小十餘決敏功晝夜并作凡所獨治南自曲頭集抵青田八十里北自陸灣至呂梁四十里所與監司曹郎雜治直河南岸堤九十丈茶城而上接曹單隄百六十里一切指畫皆可經久遷山東左叅政抗議泃口膠河俱不可開忤柄臣意自引歸巡撫張佳允以邊才薦起督漕于淮按視淮南邵伯等三河疏內河以通漕艘力任艱鉅致疾篤趣召同官囑曰內河誠便利然太適湖隄易隕宜別為護隄不即數百里魚鱉矣顧其子伯禮曰吾死有

賻其歸之官以佐隄遂瞑敏功性孝友父嘗卒邁盜冒鋒刃出之愛弟敏効尤篤敦恤里閭湖人懷而祠之神宗朝贈太僕卿

俞南金朱志字國良嘉靖壬戌進士性孝友有冰蘖搽弟天

撫嫠婦以節旌初任刑部主事出張仁沈清伯于獄陞常德

府知府值水災捐俸瘞骸固築隄防民以全活榮藩欲廣莊

田以千金壽不顧也稔知饒明德寃忤權貴出之再守馬湖

猺夷叛服不常單車諭降謝病歸孫喬桂字元芳天啟壬戌

進士舊志皆作萬歷誤授南直潛山知縣廉靜有古循吏風鄭言沉

獄十五載廉其情出之八虎憑社為民害詢其民除之河水

漂疾渡者苦觸沒捐俸建梁又創義冢瘞無主骨以瘁病歸卒于塗

張大忠朱志字國禎嘉靖壬戌進士授刑部主事歷南直廬州府知府除合肥巨奸勦英霍山賊創行條鞭新法士民祠之陞陝西副使佐胡司馬閱延綏固原甘肅三邊司馬以叅將哮拜屢獲首功欲授總兵官大忠持不可曰非我族類也後承恩父子果叛陞江西按察使藩邸多踰制強婚民間苦之大忠爲釐禁尋乞終養歸起陞廣東布政使人覲道卒從兄大雅字心宇號正叔嘉靖甲子舉人授南直海門知縣好著書有易卦緯論初惺類語四書衍義行世

